

靈寶領教濟度金書卷之一百二十九 朝七

洞微高古開光救苦真人奉金真授

靈寶通玄弘教水南先生林靈真編

科儀之成品度星齋用

真靈醮儀

燒香頌

各禮師存念如法

衛靈

鳴法鼓二十四通

發爐

請稱法位

具位臣某謹重誠上啓臣以宿慶攸鍾獲逢
昌運瑤圖瓊簡身佩心修未能結友空山餐
和鍊景相期高蹈遊宴虛无尚復塵寰與時
俯仰駒陰暗老動冒玄章曲荷慈觀密加涵
育山立班著奏對宸嚴激越寸衷益深無敢
凡有投告敢不關聞臣昨為齋主恭崇建十
迴度人道場重賴天恩慶成釐事輒修菲醮
庸致微忱敢冀威旂俯垂鑒映臣誠惶誠恐
稽首頓首再拜奏請

臣謹奉降

太上元極大道虛无自然元始天尊太上大
道君太上老君十方靈寶天尊三寶丈人三
寶天君伏乞應感分輝降臨醮座

臣謹奉降

昊天玉皇上帝紫微大帝天皇大帝五方五
老上帝三十二天上帝四梵天君木公金母
諸天衆聖天真大神上聖高尊伏乞應感分
輝降臨醮座

臣謹奉降

太陽太陰五星道君五斗星君二十八宿星
君南斗六司真君北斗七元真君璇璣玉衡
周天星象伏乞應感分輝降臨醮座

臣謹奉降

諸天丞相南昌上官韓司主錄監生大神度
人不死尊神南極長生大君度世司馬大神
好生韓君丈人南上司命司錄延壽益算度
厄尊神迴骸起死無量度人君伏乞應感分
輝降臨醮座

臣謹奉降

青帝護魂君白帝侍鏡君赤帝養赤君黑帝

通血君黃帝中主君五天五帝大魔王三界
大魔王十方无極飛天神王長生大聖无量
度人君飛天神人飛天使者飛天騎吏伏乞
應感分輝降臨醮座

臣謹奉降

三十六部專經玄都紫微上官侍經玉郎王
童玉女典禁靈妃神仙騎吏三洞威神三寶
官屬伏乞應感分輝降臨醮座

臣謹奉降

玄中大法師三天大律師天真皇人妙行真
人玄一三真人太虛真人太極左官仙翁沖
應真人名山洞府領教真仙得道聖衆本靖
相玄真經籍度三師真人伏乞應感分輝降
臨醮座

臣謹奉降

靈寶三十二天王童玉女功曹使者直符香
官五方五靈玉童玉女諸天飛龍騎吏三洞
天地神真日月星宿江河湖海救濟九宮五
帝兵馬乘騎伏乞應感分輝降臨醮座

臣謹奉降

靈寶領仙監齋諸君史六部治職仙官赫奕
仙曹施用仙曹三界所向仙曹仙靈官吏伏
乞應感分輝降臨懸座

臣謹奉降

靈寶玄壇香官使者左右龍虎君四直玉文
功曹三界直符使者直壇土地虛空監察應
感具靈伏乞應感分輝降臨懸座

初獻

臣謹重誠上啓臣以緣會天開依光紫極授
法初志金石微盟弘道度人終天無怠叨恩
傾教激越寸衷職守所縻敢云履曠今有齋
主某情鍾天屬痛軫亡靈四大各離九原長
往羅鄴泉曲幽路冥關罔測升沉濯滌憲網
非憑洪造曷克超凌伏聞靈寶本章洞玄上
品惠周幽顯萬通之宗十遍周迴生成數備
迴骸起死白骨成人真接科儀曲垂援拯巨
等澡澄一念率勸衆官嚴潔瑤壇鋪張玉幣
法天象地呼陰召陽吟詠琅函宣揚瓊範經
周十遍科按六時白簡開幽金符度命功圓

果滿魔試不干春到寒庭陽回夜壑靈光明
耀祖烝彌羅鬱絕風輪俄成道境十華鼓舞
喜慶難言帝力巍巍神功蕩蕩蕪徒劇環
草莫耐敢藉苞荒僭修倫祭類繁可薦黍稷
非馨有異有嚴凌兢萬坐伏願高真月鑒列
聖時歆曲采丹青俯原凌躡豈垂終惠普濟
存亡臣不勝虔祝之至

亞獻

臣謹重誠上啓伏以視聽自民禍福由己叩
關哀籲既罄忱恂丹絳昭回諒蒙善應今玄
壇所度亡靈承恩紫闕超迹黑單聽法參真
聞經悟道千生際遇踴躍弗讓更冀教制地
祇疾除罪簿制魔保舉魂度朱陵受化更生
超凌三界千冤解釋萬罪清夷惠為三途澤
覃六道火山息焰冰池靜波劍變鸞林刀化
玉樹飛輪停運飄戟摧鋒水絕盟言地除簡
對寒林滯魄曠野窮魂動植飛潛胎卵濕化
均離惡業共證生方更願地紀安寧天圖朗
晏星宿輝潤風雨調平河洛昭符山川效順
物無疵癘塞絕烽煙衆賢和朝三農樂野玄

網丕開道化興行蒙如慈祈恪昭感應臣不
勝虔祝之至

終獻

宣都疏

臣謹重誠上啓以今香殘蘭篆燭暗連輝壁
聲收聲瓊鐘息響通運金闕經入琅函十極
傾光諸天復位寂無所寂玄之又玄臣等速
返凡籠身辭聖陸靈光煒燁攀戀無階臣下
情無任激切之至謹稽首再拜奉送

舉額 復爐

迴斡頌

出堂頌

十方懺儀

東方

臣等今故燒香皈身皈神皈命仰謝

東方无極太上靈寶天尊九炁青天太清玄
元无上三天无極大道太上丈人天帝君上
皇老人三十九真七十二聖九老仙都君高
玄真君九炁丈人始生青真東華玉真高晨
大道君司馬上相青童君元老九玄主仙真

(101)A 4 25-1-0

人無執數眾百千萬重道悉千二百官君太清玉陛下青宮九炁五門神仙四司真人諸天至極上聖大神俯謝地司東鄉無極世界五嶽四瀆神仙至真懺悔亡故某普及幽明究親平等積劫循環歷生報對六根三業五

欲七情陰過陽愆日增月累罪結東方九幽長夜之府魂繫東鄉諸大地獄之中苦惱備嬰莫由解贖因今轉經行道懺悔首陳伏冀上聖矜憐列真開宥告下東方三官九署百二十曹宿世罪根咸與落滅青天司命注上

生名飛度南宮永辭北府不經輪轉衣食自然見在權榮普天康泰得道之後升入無形和與道合真

南方

臣等今故燒香皈身皈神皈命仰謝

南方无極太上靈寶天尊三炁丹天太清南極皇上老君洞靈玉帝上元禁宮三炁丈人始老玄真萬福君萬福丈人赤帝丹靈高仙高真諸天至極上聖大神俯謝地司南鄉无極世界五嶽四瀆神仙至真懺悔亡故某普

及幽明究親平等積劫循環歷生報對六根三業五欲七情陰過陽愆日增月累罪結南方九幽長夜之府魂繫南鄉諸大地獄之中苦惱備嬰莫由解贖因今轉經行道懺悔首陳伏冀上聖矜憐列真開宥告下南方三官

九署百二十曹宿世罪根咸與落滅丹天司命注上生名飛度南宮永辭北府不經輪轉衣食自然得道之後升入無形和與道合真

西方

臣等今故燒香皈身皈神皈命仰謝

西方无極太上靈寶天尊七炁素天太清西華高上皇帝太靈元始老君始老先生太素三元君金闕七寶後聖帝君主仙丈人太和玉女西靈金母白帝高仙四極真人諸天至極上聖大神俯謝地司西方无極世界五嶽四瀆神仙至真懺悔亡故某普及幽明究親平等積劫循環歷生報對六根三業五欲七情陰過陽愆日增月累罪結西方九幽長夜之府魂繫西鄉諸大地獄之中苦惱備嬰莫由解贖因今轉經行道懺悔首陳伏冀上聖

矜憐列真開宥告下西方三官九署百二十曹宿世罪根咸與落滅素天司命注上生名飛度南宮永辭北府不經輪轉衣食自然得道之後升入無形和與道合真

北方

臣等今故燒香皈身皈神皈命仰謝

北方无極太上靈寶天尊五炁玄天太清太上高皇五帝虛皇道君太上老君太上丈人太上大道玉晨君北極真公萬聖道主太陰真人妙行真人太陰司命典死錄籍君注算司馬總司主煞大神太皇真人神仙玉女北方无極世界一切神仙俯謝地司北方无極世界五嶽四瀆神仙至真懺悔亡故某普及幽明究親平等積劫循環歷生報對六根三業五欲七情陰過陽愆日增月累罪結北方九幽長夜之府魂繫北鄉諸大地獄之中苦惱備嬰莫由解贖因今轉經行道懺悔首陳伏冀上聖矜憐列真開宥告下北方三官九署百二十曹宿世罪根咸與落滅玄天司命注上生名飛度南宮永辭北府不經輪轉衣

食自然見在懽榮普天康泰得道之後升入無形和與道合真

東北方

臣等今故燒香皈身皈神皈命仰謝

東北方无極太上靈寶天尊東北方始蒼天

太清无極虛无自然大道至真上聖靈寶始

青老君九靈先生玉華真人萬帝高真諸天

至極上聖諸神制靈賢都統神人萬度萬生

君皇上元老君真人玉女俯謝地司東北鄉

无極世界五嶽四瀆神仙至真懺悔亡故某

普及幽明冤親平等積劫循環歷生報對六

根三業五欲七情陰過陽愆日增月累罪結

東北方九幽長夜之府魂繫東北鄉諸大地

獄之中苦惱備嬰莫由解贖因今轉經行道

懺悔首陳伏冀上聖矜憐列真開宥告下東

北方三官九署百二十曹宿世罪根咸與落

滅梵天司命注上生名飛度南宮永辭北府

不經輪轉衣食自然見在懽榮普天康泰得

道之後升入無形和與道合真

東南方

臣等今故燒香皈身皈神皈命仰謝

東南方无極太上靈寶天尊東南方始丹天

太清洞極虛无自然至玄道君上聖靈寶始

丹赤陽元老君南極老子太和先生三靈玄

上萬福皇老丈人丹靈高皇太陽真人好生

度命司馬玄真三元君紫宸大道君南明洞

靈虛皇道君朱宮赤精南宮司命四極真人

諸天至極上聖尊神俯謝地司東南鄉无極

世界五嶽四瀆神仙至真懺悔亡故某普及

幽明冤親平等積劫循環歷生報對六根三

業五欲七情陰過陽愆日增月累罪結東南

方九幽長夜之府魂繫東南鄉諸大地獄之

中苦惱備嬰莫由解贖因今轉經行道懺悔

首陳伏冀上聖矜憐列真開宥告下東南方

三官九署百二十曹宿世罪根咸與落滅梵

天司命注上生名飛度南宮永辭北府不經

輪轉衣食自然見在懽榮普天康泰得道之

後升入無形和與道合真

西南方

臣等今故燒香皈身皈神皈命仰謝

西南方无極太上靈寶天尊西南方始素天

太清无極元皇真君至真上聖太靈虛皇靈

寶始素老君洞虛太陽尊神俯謝地司西南

鄉无極世界五嶽四瀆神仙至真懺悔亡故

某普及幽明冤親平等積劫循環歷生報對

六根三業五欲七情陰過陽愆日增月累罪

結西南方九幽長夜之府魂繫西南鄉諸大

地獄之中苦惱備嬰莫由解贖因今轉經行

道懺悔首陳伏冀上聖矜憐列真開宥告下

西南方三官九署百二十曹宿世罪根咸與

落滅梵天司命注上生名飛度南宮永辭北

府不經輪轉衣食自然見在懽榮普天康泰

得道之後升入無形和與道合真

西北方

臣等今故燒香皈身皈神皈命仰謝

西北方无極太上靈寶天尊西北方始玄天

尊上元皇道君九天元虛洞寶太上真老君

无量太華靈寶始玄老君至真上聖靈寶尊

神俯謝地司西北方无極世界五嶽四瀆神

仙至真懺悔亡故某普及幽明冤親平等積

劫循環歷生報對六根三業五欲七情陰過
陽愆日增月累罪結西北方九幽長夜之府
魂繫西北鄉諸大地獄之中苦惱備嬰莫由
解贖因今轉經行道懺悔首陳伏冀上聖矜
憐列真開宥告下西北方三官九府百二十
曹宿世罪根咸與落滅梵天司命注上生名
飛度南宮永辭北府不經輪轉衣食自然見
在懽榮普天康泰得道之後升入無形和與
道合真

上方

臣等今故燒香皈身皈神皈命仰謝
上方无極太上靈寶天尊太上无形无名无
頂无極至真太上帝高皇大帝九天尚父
元始天王元始丈人至真靈寶洞玄太上元
靈老君无極大聖至真諸君丈人諸天至極
上聖尊神懺悔亡故某普及幽明冤親平等
積劫循環歷生報對六根三業五欲七情陰
過陽愆日增月累罪結上方九幽長夜之府
魂繫上鄉諸大地獄之中苦惱備嬰莫由解
贖因今轉經行道懺悔首陳伏冀 聖矜憐

列真開宥告下上方三官九府百二十曹宿
世罪根咸與落滅梵天司命注上生名飛度
南宮永辭北府不經輪轉衣食自然見在懽
榮普天康泰得道之後升入無形和與道合
真

下方

臣等今故燒香皈身皈神皈命仰謝
下方无極太上靈寶天尊已得道大聖衆至
真尊神无極大道下方玄黃洞玄靈寶高皇
九土四司五帝十二仙君太靈皇母四司真
人后土九地元皇九君四瀆五嶽佐命十仙
儲佐丈人三十六洞天七十二福地三百六
十名山二十四治化真人九江四海十二溪
具靈洞山澤一切神仙至真懺悔亡故某普
及幽明冤親平等積劫循環歷生報對六根
三業五欲七情陰過陽愆日增月累罪結下
方九幽長夜之府魂繫下鄉諸大地獄之中
苦惱備嬰莫由解贖因今轉經行道懺悔首
陳伏冀上聖矜憐列真開宥告下下方三官
九府百二十曹宿世罪根咸與落滅梵天司

命注上生名飛度南宮永辭北府不經輪轉
衣食自然見在懽榮普天康泰得道之後升
入無形和與道合真

出堂如式

靈寶領教濟度金書卷之一百二十九